

全上古三代秦漢
梁

第八
函
十
冊

全梁文卷二十一

烏程嚴可均校輯

昭明太子統

三

令旨解二諦義

二諦理實深玄自非虛懷無以通其弘遠明道之方其由非一舉要論之不出境智或時以境明義或時以智顯行至於二諦卽是就境明義若迷其方三有不絕若達其致萬累斯遣所言二諦者一是眞諦一名俗諦眞諦亦名第一義諦俗諦亦名世諦眞諦俗諦以定體立名第一義諦世諦以褒貶立目若以次第言說應云一眞諦二俗諦一與二合數則爲三非直數過於二亦名有前後於義非便眞旣不因俗而有俗亦不因眞而生正可得言一眞一俗眞者是實義卽是平等更無異法能爲雜閒俗者卽是集義此法得生浮僞起作第一義者卽無生境中別立美名言此法最勝

最妙無能及者世者以隔別爲義生滅流動無有住相涅槃經言
出世人所知名第一義諦世人所知名爲世諦此卽文證衰貶之
理二諦立名差別不同真俗世等以一義說第一義諦以二義說
正言此理德旣第一義亦第一世旣浮僞更無有義所以但立世
名諦者以審實爲義真諦審實是真俗諦審實是俗真諦離有離
無俗諦卽有卽無卽有卽無斯是假名離有離無此爲中道真是
中道以不生爲體俗旣假名以生法爲體

南潤寺慧超諮曰浮僞起作名之爲俗離於有無名之爲真未審
浮僞爲當與真一體爲當有異令旨荅曰世人所知生法爲體出
世人所知不生爲體依人作論應如是說若論真卽有是空俗指
空爲有依此義名不得別義

又諮真俗旣云一體未審真諦亦有起動爲當起動自動不關真
諦令旨又荅真諦寂然無起動相凡夫惑識自橫見起動

又諮未審有起動而凡夫橫見無起動而凡夫橫見令旨又荅若有起動則不名橫見以無動而自動所以是橫

又諮若法無起動則唯應一諦令旨又荅此理常寂此是一諦橫見起動復是一諦唯應有兩不得言一

又諮爲有橫見爲無橫見令旨又荅依人爲語又此橫見

又諮若依人語故有橫見依法爲談不應見動令旨又荅法乃無動不妨橫者自見其動

丹陽尹晉安王蕭綱諮曰解旨依人爲辨有生不生未審浮虛之與不生只是一體爲當有異令旨荅曰凡情所見見其起動聖人所見見其不生依人爲論乃是異體若語相卽則不成異具如向釋不復多論

又諮若真不異俗俗不異真豈得俗人所見生法爲體聖人所見不生爲體令旨荅卽俗知真卽真見俗就此爲談自誠無異約人

辨見自有生不生殊

又諮未審俗諦之體既云浮幻何得於真實之中見此浮幻令旨
荅真實之體自無浮幻惑者橫構謂之爲有無傷真實體自玄虛
又諮聖人所見見不流動凡夫所見自見流動既流不流異愚爲
不得爲一令旨荅不謂流不流各自一體正言凡夫於不流之中
橫見此流以是爲論可得成一

又諮眞寂之體本自不流凡夫見流不離眞體然則但有一眞不
成二諦令旨荅體恆相卽理不得異凡見浮虛聖觀眞寂約彼凡
聖可得立二諦名

招提寺慧珍諮曰凡夫見俗以生法爲體聖人見眞以不生爲體
未審生與不生但見其異復依何義而得辨一令旨荅曰凡夫於
無稱有聖人卽有辨無有無相卽此談一體

又諮未審此得談一一何所名令旨荅曰正以有不異無無不異

有故名爲一更無異名

又諮若無不異有有不異無但見其一云何爲二令旨答凡夫見有聖人見無兩見既分所以成二

又諮聖人見無無可稱諦凡夫見有何得稱諦令旨答聖人見無在聖爲諦凡夫審謂爲有故於凡爲諦

栖立寺曇宗諮曰聖人爲見世諦爲不見世諦令旨答曰聖知凡人見有世諦若論聖人不復見此

又諮聖人既不見世諦云何以世諦教化眾生令旨答聖人無惑自不見世諦無妨聖人知凡夫所見故曲隨物情說有二諦

又諮聖人知凡見世諦卽是凡夫不令旨答此凡卽是世諦聖人亦不此凡

又諮聖既不見凡焉知凡見世諦令旨答聖雖自無凡亦能知有凡自謂爲有故曲赴其情爲說世諦

司徒從事中郎王規諮曰未審真俗既不同豈得相卽之義令旨
荅聖人所得自見其無凡人所得自見其有見自不同無妨俗不
出真外

又諮未審既無異質而有二義爲當義離於體爲當卽義卽體令
旨荅更不相出名爲一體愚聖見殊自成異義

又諮凡夫爲見俗亦得見真不令旨荅止得見俗不得見真

又諮體既相卽寧不覩真令旨荅凡若見真不應覩俗覩俗既妄
焉得見真

靈根寺僧遷諮曰若第一以無過爲義此是讚歎之名真離於俗
亦應是讚歎之名令旨荅曰卽此體真不得言歎第一義諦既更
立美名所以是歎

又諮無勝我者旣得稱讚歎我體卽真何故非歎令旨荅無勝我
者所以得稱讚歎我體卽真亦是我真故非讚歎

又諮我無過者所以得稱讚歎我是不僞何得非讚令旨答不僞
直是當體之名如人體義謂之解義正足稽其實體豈成讚歎
又諮此法無能出者焉能卽是讚歎令旨答旣云無出非讚如何
羅平侯蕭正立諮曰未審俗諦是生法以不令旨答曰俗諦之體
正是生法

又諮俗旣橫見何得有生令旨答橫見爲有所以有生

又諮橫見爲有實是無法實旣無法說何爲生令旨答卽此生法
名爲橫見亦卽此橫見名爲生法

又諮若是橫見不應有生若必有生何名橫見令旨答旣云橫見
實自無生但橫見爲有有此橫生

衡山侯蕭恭諮曰未審第一義諦旣有義目何故世諦獨無義名
令旨答曰世旣浮俗無義可辨

又諮若無義可辨何以稱諦令旨答凡俗審見故立諦名

又諮若凡俗見有得受諦名亦應凡俗見有得安義字令旨答凡俗審見故諦名可立浮俗無義何得強字爲義

又諮浮俗雖無實義不無浮俗之義既有此浮俗何得不受義名令旨答正以浮俗故無義可辨若有義可辨何名浮俗

中興寺僧懷諮曰令旨解言真不離俗俗不離真未審真是有相俗是有相有無不殊何得同體令旨答曰相與無相此處不同但凡所見有卽是聖所見無以此爲論可得無別

又諮旣是一法云何得見爲兩見旣有兩豈是一法令旨答理乃不兩隨物所見故得有兩

又諮旣見有兩豈不相違令旨答法若實兩可得相違法實不兩人見是兩就此作論焉得相乖

又諮人見有兩可說兩人理旣是一豈得有兩令旨答理雖不兩而約人成兩

始興王第四男蕭映諮曰第一義諦其義第一德亦第一不令旨
荅曰義既第一德亦第一

又諮直言第一已包德義何得復加義字以致繁複令旨荅直言
第一在義猶昧第一見義可得盡矣

又諮若加以義字可得盡美何不加以德字可得盡美令旨荅第
一是德豈待復加但加義字則德義雙美

又諮直稱第一足見其美偏加義字似有所局令旨荅第一表德
復加義字二美俱陳豈有所局

吳平世子蕭勵諮曰通旨云第一義諦世諦褒貶立名真俗二諦
定體立名尋真諦之理既妙絕言慮未審云何有定體之旨令旨
荅曰談其無相無真不真寄名相說以真定體

又諮若真無諦無體今寄言辨體未審真諦無相何不寄言辨體
令旨荅寄言辨體猶恐貶德若復寄言辨相則有累虛玄

又諮眞諦玄虛離於言說今旣稱有眞豈非寄言辨相令旨答寄有此名名自是相無傷此理無相虛寂

又諮未審此寄言辨體爲是當理爲不當理令旨答無名而說名不合當理

又諮若寄言辨名名不當理未審此寄將何所說令旨答雖不當理爲接引眾生須名相說

宋熙寺慧令諮曰眞諦以不生爲體俗諦以生法爲體而言不生卽生生卽不生爲當體中相卽爲當義中相卽令旨答云體中相卽義不相卽

又諮義旣不卽體云何卽令旨答凡見其有聖觀其無約見成異就體恆卽

又諮體旣無兩何事須卽令旨答若無體無別兩緣見有兩見旣兩異須明體卽

又諮若如解旨果是就人明卽令旨答約人見爲二諦所以名生就人見明卽此亦何妨

始興王第五男蕭暕諮曰眞諦稱眞是實眞不令旨答曰得是實眞

又諮菩薩會眞之時爲忘俗忘眞不令旨答忘俗忘眞故說會眞又諮若忘俗忘眞故說會眞忘俗忘眞何謂實眞令旨答若存俗存眞何謂實眞正由兩遣故謂實眞

又諮若忘俗忘眞而是實眞亦應忘眞忘俗而是實俗令旨答忘俗忘眞所以見眞忘眞忘俗彌見非俗

又諮菩薩會眞旣忘俗忘眞今呼實眞便成乖理令旨答假呼實眞終自忘眞兩忘稱實何謂乖理

興皇寺法宣諮曰義旨云俗諦是有是無故以生法爲體未審有法有體可得稱生旣是無法而云何得有生義令旨答俗諦有無

相待而立既是相待故並得稱生

又諮若有無兩法並稱爲生生義既一則有無無異令旨答俱是凡夫所見故生義得同是有是無焉得不異

又諮若有無果別應有生不生令旨答既相待立名故同一生義程鄉侯蕭祇諮曰未審第一之名是形待以不令旨答正是形待又諮第一無相有何形待令旨答既云第一豈得非待

又諮第一是待既稱第一是諦待於第一何不名爲第二若俗諦是待而不稱第二亦應真諦是待不名第一令旨答若稱第一是待於義已足無假說俗第二方成相待

又諮若世諦之名不稱第二則第一之稱無所形待令旨答第一

褒真既云相待知名是待直置可知

光澤寺法雲諮曰聖人所知之境此是真諦未審能知之智是謂真諦是謂俗諦令旨答曰能知是智所知是境智來冥境得言卽

眞

又諮有智之人爲是眞諦爲是俗諦令旨答若呼有智之人卽是俗諦

又諮未審俗諦之人何得有眞諦之智令旨答聖人能忘於俗所以得有眞智

又諮此人旣冥無生亦應不得稱人令旨答冥於無生不得言人寄名相說常自有人

靈根寺慧令諮曰爲於眞諦中見有爲俗諦中見有令旨答曰於眞諦中橫見有有

又諮俗諦之有爲實爲虛令旨答是虛妄之有

又諮爲當見妄爲當見有令旨答見於妄有

又諮無名相中何得見有名相令旨答於無名相見有名相所以妄有

又諮於無名相妄見爲有譬如火熱惑者言冷得就熱中有冷相
不若於無相而有名相亦於火中應有此冷令旨荅火自常熱妄
見有冷此自惑冷熱未常異

湘宮寺慧興諮曰凡夫之惑爲當但於真有迷於俗亦迷令旨荅
曰於真見有此是迷真既見有俗不成迷俗

又諮若使解俗便成解真若不解真豈得解俗令旨荅真理虛寂
惑心不解雖不解真何妨解俗

又諮此心不解真於真可是惑此心既解俗於惑應非惑令旨荅
實而爲語通自是惑辨俗森羅於俗中各解

莊嚴寺僧旻諮曰世俗心中所得空解爲是真解爲是俗解令旨
荅可名相似解

又諮未審相似爲真爲俗令旨荅習觀無生不名俗解未見無生
不名真解

又諮若能照之智非真非俗亦應所照之境非真非俗若是非真非俗則有三諦令旨答所照之境既卽無生無生是真豈有三諦又諮若境卽真境何不智卽真智令旨答未見無生故非真智何妨此智未真而習觀真境豈得以智未真智而使境非真境宣武寺法寵諮曰真諦不生不滅俗諦有生有滅真俗兩義得言有異談其法體只得是一未審體從於義亦得有二不令旨答曰體亦不得合從於義

又諮未審就凡聖兩見得言兩義亦就凡聖兩見得言兩體令旨答理不相異所以云一就凡聖兩見得有二體之殊

又諮若使凡者見有聖人見無便應凡夫但見世諦有聖人應見太虛無令旨答太虛亦非聖人所見太虛得名由於相待既由待生並凡所見

又諮凡夫所見空有得言是一不令旨答就凡爲語有實異無約

聖作談無不異有

建業寺僧愍諮曰俗人解俗爲當解參差而言解俗爲當見俗虛假而言解俗令旨答只是見俗參差而言解俗

又諮俗諦不但參差亦是虛妄何故解參差而不解虛妄令旨答若使凡夫解虛妄卽是解真不解虛妄所以名爲解俗

光澤寺敬脫諮曰未審聖人見真爲當漸見爲當頓見令旨答漸見

又諮無相虛懷一見此理萬相並寂未審何故見真得有由漸令旨答曰自凡之聖解有淺深真是虛寂不妨見有由漸

又諮未審一得無相並忘萬有爲不悉忘令旨答一得無相萬有悉忘

又諮一得無相忘萬有者亦可一得虛懷窮彼真境不應漸見令旨答如來會寂自是窮真淺行聖人恆自漸見